



水
經
注

ル 5
980
7



水經第二十四



漢 桑欽撰

後魏酈道元注

明 吳中珩校

睢水

瓠子水

汶水

睢水出梁郡鄆縣

睢水出陳留縣西浪蕩渠東北流地理志曰睢水首受陳留浚儀浪蕩水也經言出鄆非矣又東逕高陽故亭北俗謂之陳留北城非也蘇林曰高陽者陳留北縣也按在留使鄉聚名也有漢廣野君

廟碑延熹六年十二月雍丘令董生仰餘徽於千載遵茂美於絕代命縣人萇照爲文用章不朽之德其畧云輟洗分餐諮謀帝猷陳鄭有涿鹿之功海岱無牧野之戰大康華夏綏靜黎物生民以來功盛莫崇今故字無聞而軍碑介立矣陳留風俗傳曰酈氏居於高陽沛公攻陳留縣酈食其有功封高陽侯有酈峻字文山官至公府掾大將軍商有功食邑于涿故自陳留縣有鉞亭鉞鄉建武二年世祖封王常爲侯國也睢水又東逕雍丘縣故城北縣舊杞國也殷湯周武以封夏后繼禹之嗣

楚滅杞秦以爲縣圈稱曰縣有五陵之名故以氏縣矣城內有夏后祠昔在二代享祀不輟秦始皇圖築其表爲大城而以縣焉睢水又東水積成湖俗謂之白羊陂陂方四十里右則姦梁陂水注之其水上承陂水東北逕雍丘城北又東分爲兩瀆謂之雙溝俱入白羊陂陂之東合洛架水口水上承汜水謂之洛架水東南流入于睢水睢水又東逕襄邑縣故城北又東逕雍丘城北睢水又東逕寧陵縣故城南故葛伯國也王莽改曰康善矣歷鄆縣北二城南北相去五十里故經有出鄆之文

城東七里水次有單父令楊彥尚書郎楊禪字文節兄弟二碑漢炆和中立也

又東過睢陽縣南

睢水又東逕橫城北春秋左傳昭公二十一年樂大心豐愆華恠禦華向於橫杜預曰梁國睢陽縣南有橫亭今在睢陽縣西南世謂之炆城蓋炆橫聲相近習傳之非也睢水又逕新城北卽宋之新城亭也春秋左傳文公十四年公會宋公陳侯衛侯鄭伯許男曹伯晉趙盾盟于新城者也睢水又東逕高鄉亭北又東逕亳城北南亳也卽湯所都

矣睢水又東逕睢陽縣故城南周武王封微子啓于宋以嗣殷後爲宋都也昔宋元君夢江使乘輜車被繡衣而謁於元君元君感衛平之言而求之于泉陽男子余且獻神龜於此矣秦始皇二十二年以爲碭郡漢高祖嘗以沛公爲碭郡長天下既定五年爲梁國文帝十二年封少子武爲梁王太后之愛子景帝寵弟也是以警衛貂侍飾同天子藏珍積多擬京師招延豪傑士咸歸之長卿之徒免官來遊廣睢陽城七十里大治宮觀臺苑屏榭勢並皇居其所經構也役夫流唱必曰睢陽創傳

曰此始也城西門卽寇先鼓琴處也先好釣居睢水傍宋景公問道不告殺之後十年止此門鼓琴而去宋人家奉事之南門曰盧門也春秋華氏居盧門里叛杜預曰盧門宋城南門也司馬彪郡國志曰睢陽縣有盧門亭城內有高臺甚秀廣巍然介立超焉獨上謂之蠡臺亦曰升臺焉當昔全盛之時故與雲霞競遠矣續述征記曰迴道似蠡故謂之蠡臺非也余按闕子稱宋景公使工人爲弓九年乃成公曰何其遲也對曰臣不復見君矣臣之精盡於弓矣獻弓而歸三日而死景公登虎圈

之臺援弓東面而射之矢踰于孟霜之山集于彭城之東餘勢逸勁猶飲羽于石梁然則蠡臺卽是虎圈臺也蓋宋世牢虎所在矣晉太和中大司馬桓温入河命豫州刺史袁真開石門鮮卑堅戍此臺真頓甲堅城之下不果而還蠡南如西又有一臺俗謂之女郎臺臺之西北城中有涼馬臺臺東有曲池池北列兩釣臺水周六七百步蠡臺直東又有一臺世謂之雀臺也城內東西道北有晉梁王妃王氏陵表竝列二碑碑云妃諱粲字女儀東萊曲城人也齊北海府君之孫司空東武景侯之

季女咸熙元年嬪于司馬氏秦始皇二年妃于國太
康五年薨營陵于新蒙之太康九年立碑東卽梁
王之吹宮也基陛階礎尚在今建追明寺故宮東
卽安梁之舊地也廣周五六百步水列釣臺池東
又有一臺世謂之清泠臺北城憑隅又結一池臺
晉灼曰或說平臺在城中東北角亦或言兔園在
平臺側如淳曰平臺離宮所在今城東二十里有
臺寬廣而不甚極高俗謂之平臺余按漢書梁孝
王傳稱王以功親爲大國築東苑方三百里廣睢
陽城七十里大治宮室爲複道自宮連屬於平臺
三十餘里複道自宮東出楊州之門左陽門卽睢
陽東門也連屬於平臺側近矣屬之城隅則不能
是知平臺不在城中也梁王與鄒枚司馬相如之
徒極遊於其上故齊隨郡王山居序所謂西園多
士平臺盛賓鄒馬之客咸在伐木之歌屢陳是用
追芳昔娛神遊千古故亦一時之盛事謝氏賦雪
亦曰梁王不悅遊於兔園今也歌堂淪宇律管埋
音孤墓塊立無復曩日之望矣城北五六里便得
漢太尉喬玄墓冢東有廟卽曹氏孟德親酌處操
本微素嘗候於玄玄曰天下將亂能安之者其在

君乎操感知已矣經玄墓祭云操以頑質見納君子士死知已懷此無忘又承約言徂沒之後路有經由不以斗酒隻雞過相沃酹車過三步腹痛勿怨雖臨時戲言非至親篤好胡肯爲此辭哉悽愴致祭以申宿懷冢列數碑一是漢朝羣儒英才哲士感喬氏德行之美乃共刊石立碑以示後世一碑是故吏司徒博陵崔列廷尉河南吳整等以爲至德在已揚之由人苟不驕述夫何舍焉乃共勒嘉石昭明芳烈一碑是隴西袍罕北次陌碭守長隲爲左尉漢陽獮道趙馮孝高以喬公嘗牧涼州感三綱之義慕將順之節以爲公之勳美宜宣舊邦乃樹碑頌以昭令德兂和元年主記掾李反字仲遼作碑文碑陰有石鼎文建寧二年拜司空又有中鼎文建寧四年拜司徒又有左鼎文兂和元年拜太尉鼎名文曰故臣門人相與述公之行者度體則文德銘于三鼎武功勒于征鉞書于碑陰以昭兂懿又有鉞文稱是用鏤石假象作茲征鉞軍鼓陳之于東階亦以昭公之文武之勳焉廟南列二石柱柱東有二石羊羊北有二石虎廟前東北有石駝駝西北有二石馬皆高大亦不甚雕飾

惟廟頽構粗傳遺墉石鼓仍存鉞今不知所在
 水於城之陽積而為逢洪陂陂之西南有陂又東
 合明水水上承城南大池池周千步南流會睢謂
 之明水絕睢注渙睢水又東南流歷于竹園水次
 綠竹蔭渚菁菁實望世人言梁王竹園也睢水又
 東逕穀熟縣故城北睢水又東斬水出焉睢水又
 東逕粟縣故城北地理志曰侯國也王莽曰成富
 睢水又東逕大丘縣故城北地理志曰故敬丘也
 漢武帝元朔三年封魯恭王子節侯劉政為侯國漢
 明帝更從今名列仙傳曰仙人文賓邑人賣鞞履

為業矣睢水又東逕芒縣故城北漢高帝六年封
 酈跖為侯國王莽之傳治世祖改曰臨睢城西二
 里水南有豫州從事皇毓碑殞身州牧陰君之罪
 時年二十五臨睢長平與李君二千石承輪氏夏
 文則高其行而悼其殞州國咨嗟旌閭表墓昭叙
 令德式示後人城內有臨睢長左馮翊王君碑善
 有治功累遷廣漢屬國都尉吏民思德縣人公府
 遂陳盛孫郎中倪定興劉伯鄜等共立石表政以
 刊遠績縣北與碭縣分水有碭山芒碭縣之間山
 澤深固多懷神智有仙者涓子立柱並隱碭山得

道漢高祖隱之呂后望氣知之卽於是處也京房易候曰何以知賢人隱師曰視四方常有太雲五色具而不雨其下賢人隱矣

又東過相縣南屈從城北東流當蕭縣南入于睢

相縣故宋地也秦始皇二十三年以爲泗水郡漢高帝四年改曰沛郡治此漢武帝元狩六年封南越桂林監居翁爲侯國曰湘成也王莽更名之吾符縣曰吾符亭也睢水東逕石馬亭亭西有漢故伏波將軍馬援墓睢水又東逕相縣故城南宋恭公之所都也國府園中猶有伯姬黃堂基堂夜被

火左右曰夫人少避伯姬曰婦人之義保傳不具夜不下堂遂遇火而死斯堂卽伯姬燬死處也城西有伯姬冢昔鄭渾爲沛郡太守於蕭相二縣與陂堰民賴其利刻石頌之號曰鄭陂睢水又左合白瀆水水上承梧桐陂陂側有梧桐山陂水西南流逕相城東而南流注于睢睢盛則北流入于陂陂溢則西北注於睢出入迴環更相通注故經有入睢之文睢水又東逕彭城郡之靈壁東東南流漢書項羽敗漢王于靈壁東卽此處也又云東逼穀泗服虔曰水名也在沛國相界又詳睢水逕穀

熟兩分而睢水為蘄水故二水所在枝分通為兼
 稱穀水之名蓋因地變然則穀水即睢水也又云
 漢軍之敗也睢水為之不流睢水又東南逕竹縣
 故城南地理志曰王莽之篤亭也李奇曰今竹邑
 縣也睢水又東與潁湖水合水上承留丘縣之潁
 陂南北百餘里東西四十里東至朝解亭西屆彭
 城留丘縣之故城東王莽更名之曰善丘矣其水
 自陂南系于睢水睢水又東南八丈故潁水注之水上
 承蘄水而北會睢水又東逕符離縣故城北漢武
 帝元光四年封路博德為侯國王莽之符合也睢

水東逕臨淮郡之取慮故城北昔汝南步遊張少
 失其母及為縣令遇母於此乃使良馬踟躕輕軒罔
 進顧訪病姬乃其母也誠願宿憑而冥感昭徵矣
 睢水又東合烏慈水水出縣西南烏慈渚潭漲東
 北流與長直故瀆合溝舊上承蘄水北流八十五
 里注烏慈水烏慈水又東逕取慮縣南又東屈逕其
 城東而北流注于睢睢水又東逕睢陵縣故城北
 漢武帝元朔元年封江都易王子劉楚為侯國王
 莽之睢睦也睢水又東與潼水故瀆會舊上承潼
 縣西南潼陂東北流逕潼縣故城北又東北逕睢

水經 卷之二十四 九
陵縣下會睢水又東南流逕下相縣故城南高祖十二年封莊侯冷耳爲侯國應劭曰下相水出沛國相縣故此加下也然則下相又是睢水之別名也東南流入于泗謂之睢口經止蕭縣非也所謂得其一而亾其二矣

瓠子河出東郡濮陽縣北河

縣北十里卽瓠河口也尚書禹貢雷夏旣澤雝沮會同爾雅曰水自河出爲雝許慎曰雝者河雝水也暨漢元炆之年河水南洑漂害民居武帝元封二年上使汲仁郭昌發卒數萬人塞瓠子決河於

是上自萬里沙還臨決河沈白馬王壁令羣臣將軍以下皆負薪填決河上悼功之不成乃作歌曰瓠子決兮將奈何殫爲河兮地不寧功無已時兮吾山平吾山平兮巨野溢魚沸鬱兮柏冬日正道弛兮離常流蛟龍騁兮放遠遊歸舊川兮神哉沛不封禪兮安知外皇謂河公兮何不仁泛濫不止兮愁苦人齧桑浮兮淮泗滿久不反兮水唯緩一曰河湯湯兮激潺湲北渡廻兮迅流難塞長茨兮湛美玉隕竹林兮捷石菑宣防塞兮萬福來於是卒塞瓠子口築宮於其上名曰宣房宮水亦謂瓠

子堰爲宣房堰而水亦以瓠子受名焉平帝已後未及修理河水東浸日月彌廣永平十二年顯宗詔樂浪人王景治渠築隄起自滎陽東至千乘一千餘里景乃防遏衝要䟽決壅積瓠子之水絕而不通唯溝瀆存焉河水舊東河逕濮陽城東北故衛也帝顓頊之墟昔顓頊自窮桑徙此號曰商丘或謂之帝丘本陶唐氏火正閼伯之所居亦夏伯昆吾之都殷之相又都之故春秋傳曰閼伯居商丘相土因之是也衛成公自楚丘遷此秦始皇徙衛君角於野王置東郡治濮陽縣濮水逕其南故

曰濮陽也沛公守濮陽環之以水張晏曰依河水自固春秋僖公十三年夏會于鹹杜預曰東郡濮陽縣東有咸城者是瓠子故瀆又東逕桃城南春秋傳曰分曹地自洮盡曹地也今甄城西南五十里有桃城或謂之洮也瓠瀆又東南逕清丘北春秋宣公十二年經書楚滅蕭晉人宋衛曹同盟于清丘京相璠曰在今東郡濮陽縣東南三十里魏都尉治

東至濟陰句縣爲新溝

瓠河故瀆又東逕句陽之小成陽城北城北側瀆

帝王世紀曰堯葬濟陰成陽西北四十里是爲穀
墨子以爲堯堂高三尺土階三等北教八狄道死
葬蚩山之陰山海經曰堯葬狄山之陽一名崇山
二說各殊以爲成陽近是堯冢也余按小成陽在
成陽西北羊里許實牛俗彥以爲囚堯城士安蓋
以是爲堯冢也瓠子北有都關縣故城縣有羊里
亭瓠河逕其南爲羊里水蓋資城地而變名由經
有新溝之異稱矣黃初中賈逵爲豫州刺史與諸
將征吳於洞浦有功魏封逵爲羊里亭侯邑四百
戶卽斯亭也俗名之羊子城非也蓋韻近字轉耳

又東右會濮水之津水上承濮渠東逕鉏丘城南
京相璠曰今濮陽城西南十五里有沮丘城六國時
沮楚同以爲楚丘非也又東逕浚城南而北去濮
陽三十五里城側有寒泉岡卽詩所謂爰有寒泉
在浚之下世謂之高平渠非也京相璠曰濮水故
道在濮陽南者也又東逕句陽縣西句瀆出焉濮
水枝渠又東北逕句陽縣之小成陽縣故東垂亭
西而北入瓠河地理志曰濮水首受沛於封丘縣
東北至都關入羊里水者也又按地理志山陽郡
有都關縣今其城在廩丘城西考地志山陽廩丘

俱屬濟陰則都關無隸山陽理又按地理志邳都亦是山陽之屬縣矣而東杜考地驗城又並言在廩丘城南推此而論似地志之悞矣或亦疆理參差所未詳瓠瀆又東逕垂亭北春秋隱公八年宋公衛侯遇于大丘經書垂也京相璠曰今濟陰句陽縣小城陽東五里有故垂亭者也

又東北過廩丘縣爲濮水

瓠河又左逕雷澤北其澤藪在大城陽縣故城西北一十餘里昔華胥履大跡處也其陂東西二十餘里南北一十五里卽舜所漁也澤之東南卽成

陽縣故史記曰武王封弟季載於成應劭曰其後乃遷于成之陽故曰成陽也地理志曰成陽有堯冢靈臺今成陽城西二里有堯陵陵南一里有堯母慶都陵於城爲西南稱曰靈都鄉曰崇仁邑號修義皆立廟四周列水潭而不流水澤通泉泉不耗竭至豐魚笱不敢採捕前並列數碑枯柏數株檀馬成林二陵南北列馳道逕通皆以磚砌之尚修整堯陵東城西五十餘步中山夫人祠堯妃也石壁階墀仍舊南西北三面長櫟聯蔭扶踈里餘中山夫人祠南有仲山甫冢冢西有石廟羊虎傾

低破碎略盡於城爲西南在靈臺之東北按郭緣生述征記自漢迄晉二千石及丞尉多刊石述叙堯卽位至永嘉三年二千七百二十有一載記于堯妃見漢建寧四年五月成陽令管邈所立碑文云堯陵北山南墓南二冢間伍員祠晉大安中立一碑是永興中建今碑祠並無處所又言堯陵在城南九里中山夫人祠在城南二里東南六里堯毋慶都冢堯陵北二里有仲山甫墓考地驗狀咸爲踈僻蓋聞疑書疑耳雷澤西南十許里有小山孤立峻上亭亭巖峙謂之歷山山北有小阜南屬池澤之東北有陶墟緣生言舜耕陶所在墟阜聯屬瀆帶瓠河也鄭玄曰歷山在河東今有舜井皇甫謚或言今濟陰歷山是也與雷澤相比余謂鄭玄之言爲然故楊雄河東賦曰登歷觀而逕望兮聊浮游於河之巖今雷首山西枕大河校之圖緯於事爲允士安又云定陶西南陶丘舜也不言在此緣生爲失瓠河之北卽廩丘縣也王隱晉書地道記曰廩丘者春秋之所謂齊邑矣實表東海者也竹書紀年晉烈公十一年田悼子卒田布殺其大夫公孫公孫以廩丘叛于趙田布圍廩丘翟角

趙孔屑韓師救廩丘及囂布戰于龍澤田布敗遁是也瓠河與濮水俱東流經所謂過廩丘爲濮水者也縣南瓠北有羊角城春秋傳曰取晉羊角遂襲我高魚天大雨自竇入介其庫登其城尅而取之者也京相璠曰衛邑也今東郡廩丘縣南有羊角城今魯邑也今廩丘東北有故高魚城俗謂之交魚城謂羊角爲角逐城皆非也瓠河又逕陽晉城南史記蘇秦說齊曰過衛陽晉之道徑于亢父之嶮者也今陽晉城在廩丘城東南一十餘里與都關爲左右也張儀曰秦下甲攻衛陽晉大關天下之匈徐廣史記音義云關一作開東之亢父則其道矣瓠河之北又有邲都城春秋隱公三年邲侵衛京相璠曰東都廩丘縣南三十里有故邲都地理志曰山陽鄉也褚先生曰漢封金安上爲侯國王莽更名之曰城穀者也瓠河又東逕黎縣故城南王莽改曰黎治矣孟康曰今黎陽也薛瓚言按黎陽在魏郡非此黎陽也世謂黎侯城昔黎侯陽寓于衛詩所謂胡爲乎泥中毛云泥中邑名疑此城也土地汗下城居小阜魏濮陽郡治也瓠河又東逕柘縣故城南地理志曰濟陰之屬縣也褚先

生曰漢武帝封金日磾爲侯國王莽之萬歲矣世猶謂之爲萬歲亭也瓠河又東逕鄆城南春秋左傳成公十六年公自沙隨還侍于鄆京相璠曰公羊作運字今東郡廩丘縣東八十里有故運城卽此城也

又北過東郡范縣東北爲濟渠與將渠合

瓠河自運城東北逕范縣與濟濮枝渠合故渠上承濟瀆於乘氏縣北逕范縣左納瓠瀆故經有濟渠之稱又北與將渠受河於范縣西北東南逕秦亭南杜預釋地東平范縣西北有秦亭也又東南逕范縣故城南王莽更名建睦也漢興平中靳允爲范令曹太祖東征陶謙於徐州張邈迎呂布郡縣響應程昱說允曰君必固范我守東阿田單之功可立即斯邑也將渠又東會濟渠自下通謂之將渠北逕范城東俗又謂之趙溝非也

又東北過東阿縣東

瓠河故瀆又東北左合將渠枝瀆上承將渠於范縣東北逕范縣北又東北逕東阿城南而東入瓠河故瀆又北逕東阿縣故城東春秋經書冬及齊侯盟于柯左傳曰冬盟于柯始及齊平杜預曰東

水經 卷之二十四
阿卽柯邑也按國語曹沫挾匕首劫齊桓公返遂邑於此矣

又東北過臨邑縣西又東北過茌平縣東爲鄧里渠自宣防已下將渠已上無復有水將渠下水首受河自北爲鄧里渠

又東北過祝阿縣爲濟渠

河水自泗口出爲濟水濟水二瀆合而東注于祝阿也

又東北至梁鄒縣西分爲二

脉水尋梁鄒濟無二流蓋經之誤

其東北者爲濟河其東者爲時水又東北至濟西濟河東北入于海時水東至臨淄縣西屈南過太山華縣東又南至費縣東入于沂

時卽形水也音而春秋襄公三年齊晉盟于形者也京相璠曰今臨淄唯有澧水西北入沛卽地理志曰如水矣形如聲相似然則澧水卽形水也蓋以澧與時合得通稱矣時水自西安城西南分爲二水枝津別出西流德會水注之泉出昌國縣黃山西北流逕昌國縣故城南昔樂毅攻齊有功燕昭王以是縣封之爲昌國君德會水又西北五里泉

水注之水出縣南黃阜北流逕城西北入德會又西北世謂之滄浪溝又北流注時水地理志曰德會水出昌國西北至西安入洳是也時水又西逕東高苑城中而西注也俗人遏令側城南注又屈其城南史記漢文帝十五年分齊爲膠西上國都高邑徐廣音義曰樂安有高苑城故俗謂之東苑也其水又北注故瀆又西蓋野溝水注之源導延鄉城東北平地出泉西北逕延鄉城北地理志曰千乘有延鄉縣世人謂故城爲從城延從字相似讀隨字改所未詳也西北流世謂之蓋野溝又西

北流逕高苑縣北注時水時水又西逕西高苑縣故城南漢高帝六年封丙倩爲侯國王莽之常鄉也其水側城西注京相璠曰今樂安博昌縣南界有時水西通濟其上源出盤陽北至高苑下有苑時中無水杜預亦云時水於樂安枝流旱則竭涸爲春秋之乾時也左傳莊公九年齊魯戰地魯師敗處也時水西北至梁鄒城入于沛非沛入時蓋時來注沛若沛分東流明不得以時爲名尋時沛更無別流南延華費之所斯爲謬矣

汶水出太山萊蕪縣原山西南過羸縣南

萊蕪縣在齊城西南原山又在縣西南六十許里地理志汶水與淄水俱出原山西南入沛故不得過其縣南也從征記曰汶水出縣西南流又言自入萊蕪谷夾路連山百數里水隍多行石澗中出草藥饒松柏林藿綿濛崖壁相望或傾岑阻徑或迴巖絕谷清風鳴條山壑俱響凌高降深兼惴慄之懼危溪徑過懸度之艱未出谷十餘里有別谷在孤山谷有清泉泉上數丈有石穴二口容人行入穴丈餘高九尺許廣四五丈言是昔人居山之處薪爨煙墨猶存谷中林木緻密行人艱有能至矣又有少許山田引灌之蹤尚存出谷有平丘面山傍水土人悉以種麥云此丘不宐殖稷黍而宐麥齊人相承以殖之意謂麥丘所栖愚公谷也何其深沈幽翳可以託業怡生如此也余時逕此爲之踟躕爲之屢眷矣余按麥丘愚公在齊川谷猶傳其名不在魯蓋誌者之謬耳汶水又西南逕羸縣故城南春秋左傳桓公三年云會齊侯于羸博婚于齊也

又東南過奉高縣北

奉高縣漢武帝元封元年立以奉太山郡治也縣

水經 卷之二十四
北有吳季札子墓在汶水南曲中季札之聘上國也喪子於嬴博之間卽此處也從征記曰嬴縣西六十里有季札兒冢冢圓其高可隱也前有石銘一所漢末奉高令所立無所述叙標誌而已自昔恒蠲民戶灑掃之今不能然碑石糜碎靡有遺矣唯趺存焉

屈從縣西南流

汶出牟縣故城西南阜下俗謂之胡盧堆淮南子曰汶出弗其高誘曰山名也或斯阜也牟縣故城在東北古牟國也春秋時牟人朝魯故應劭曰魯

附庸也俗謂是水爲牟汶也又西南逕奉高縣故城而西南流注于汶汶水又南右合北汶水出分水谿源與中川分水東南流逕太山東右天門下谿水水出太山天門下谷東流古者帝王升封咸憇此水水上往往有石竅存焉蓋古設舍所跨處也馬第伯書云光武封太山第伯從登山去平地二十里南向極望無不覩其爲高也如視浮雲其峻石壁窅窳仰視巖石松樹鬱鬱蒼蒼如在雲中俯視谿谷碌碌不可丈尺直上七十里天門仰視天門如從穴中視天矣應劭漢官儀云太山東南

山頂名曰日觀者雞一鳴時見日始欲出長三丈許故以名焉其水自谿而東濬波注壑東南流逕龜陰之龜田山在博縣北一十五里昔夫子傷政道之陵遲故望山而懷操故琴操有龜山操焉山北卽龜陰之田也春秋定公十年齊人來歸龜陰之田是也又合環水水出太山南谿南流歷中階兩廟間從征記曰太山有下中上三廟牆闕嚴整廟中柏樹夾兩階大二十餘圍蓋漢武所植也赤眉嘗斫一樹見血而止今斧創猶存門閣三重樓榭四所三層壇一所高丈餘廣八丈樹前有大井極香冷異於凡水不知何代所搆不嘗浚渫而水旱不減庫中有漢時故樂器及神車木偶皆靡密巧麗又有石勒建武十三年未貴侯張余上金馬一匹高二尺餘形制甚精中廟去下廟五里屋宇又崇麗於下廟廟東西夾澗上廟在山頂卽封禪處也其水又屈而東流入于汶水又東南流逕南明堂下漢武帝元封元年封太山降坐明堂於山之東北陞武帝以古處嶮狹而不顯也欲治明堂於奉高傍而未曉其制濟南人公玉帶上黃帝時明堂圖圖中有一殿四面無壁以茅蓋之通水圜宮

垣爲復道上有樓從西南入名曰崑崙天子從之入以拜祀上帝焉於是上令奉高作明堂於汶水如帶圖也古引水爲壁雍處基瀆存焉世謂此水爲石汶山海經曰環水出泰山東流注于江卽此水也環水又左入於汶水汶水又西南流逕徂徠山西山多松柏詩所謂岵嶭之松也廣雅曰道梓松也抱朴子稱玉策記曰千歲之松中有物或如青牛或如青犬或如人皆壽萬歲又稱天陵有偃蓋之松也所謂樓松也魯連子曰松樅高千仞而無枝非憂王實之無柱也爾雅曰松葉柏身曰樅鄒山記曰徂嶭山在梁甫奉高傳三縣界猶有美松亦曰尤嶭之山也赤眉渠帥樊崇所堡也故崇自號尤嶭三老矣山東巢父廟山高十里山下有陂水方百許步三道流注一水東北沿谿而下屈逕縣南西北流入于一水北流歷澗西流入于汶一水南流逕陽關亭南春秋襄公十七年逆臧紇自陽關者也又西流入于汶水也

過博縣西北

汶水南逕博縣故城東春秋哀公十一年會吳伐博者也灌嬰破田橫於城下屈從其城南西流不

在西北也汶水又西南逕龍鄉故城南春秋成公二年齊侯圍龍龍囚頃公嬖人盧蒲就殺而膊諸城上齊侯親鼓取龍者也漢高帝八年封謁者陳署爲侯國汶水又西南逕亭亭山東黃帝所禪也山有神廟水上有石門舊分水 downstream 處也汶水又西南逕陽關故城西本有平縣之陽關亭矣春秋襄公十七年逆臧紇自陽關者也陽虎據之以叛伐之虎焚萊門而奔齊者也汶水又南左會淄水水出太山梁父縣東西南流逕菟裘城北春秋隱公十一年營之公謂羽父曰吾將歸老焉故郡國志曰梁父有菟裘聚淄水又逕梁父縣故城南縣北有梁父山開山圖曰太山在左亢父在右亢父知生梁甫主歿王者封太山禪梁甫故縣取名焉淄水又西南逕柴縣故城北地理志曰太山之屬縣也世謂之柴汶矣淄水又逕邾北漢高帝六年封董濞爲侯國春秋齊師圍邾邾人伐齊飲馬於斯水也昔孔子行於邾之野遇榮啓期於是衣鹿裘被髮琴歌三樂之懽夫子善其能寬矣淄水又西逕陽關城南西流注於汶水汶水又南逕巨平縣故城東而西南流城東有魯道詩所謂魯道有蕩齊

子由歸者也今汶上夾水有文姜臺汶水又西南流詩云汶水滔滔矣淮南子曰貉渡汶則歿天地之性倚伏難尋固不可以情理窮也汶水又西南逕魯國汶陽縣北王莽之汶亭也縣北有曲水池亭春秋桓公十二年經書公會祀侯莒子於曲池左傳曰平祀莒也故杜預曰魯國汶陽縣北有曲水亭漢章帝元和三年東巡太山立行宮於汶陽執金吾耿恭恭屯城門於汶上基壑存焉世謂之闕陵城也汶水又西逕汶陽縣故城北而注又西南過蛇丘縣南

汶水又西洗水出焉又西逕蛇丘縣南縣治鑄鄉故城春秋左傳宣叔娶于鑄是也杜預曰濟北蛇丘縣所治鑄鄉城者也

又西南過岡縣北

地理志鄉故闡也王莽更之曰柔也應劭曰春秋經書齊人取讎及闡亭是也杜預春秋釋地曰闡在岡縣北岡城東有一小亭今岡縣治俗人又謂之關亭京相璠曰岡縣西四十里有闡亭未知孰是汶水又西蛇水注之水出縣東北太山西南流逕汶陽之田齊所侵也自汶之北平暢極目僖公

以賜季友蛇水又西南逕鑄城西左傳所謂蛇淵
 圃也故京相璠曰今濟北有蛇丘城城下有水魯
 圃也俗謂之濁須水非矣蛇水又西南逕夏暉城
 南經書公會齊侯于下謹是也今俗謂之夏暉城
 蓋春秋左傳桓公三年公子翬如齊齊侯送姜氏
 于下謹非禮是也世有夏暉之名矣蛇水又西南
 入汶汶水又西溝水注之水出東北馬山西南流
 逕棘亭南春秋成公三年經書秋叔孫僑如帥師
 圍棘左傳曰取汶陽之田棘不服圍之南去汶水
 八十里又西南逕遂城東地理志曰蛇丘隧鄉故

隧國也春秋莊公十三年齊滅隧而戍之者也京
 相璠曰隧在蛇丘東北十里杜預亦以為然然縣
 東北無城以擬之今城在蛇丘西北蓋杜預傳疑
 之非也又西逕下謹城西而入汶水汶水又西逕
 春亭北考古無春名唯平陸縣有崇陽亭然是東
 去岡城四十里進璠所注則符並所未詳也

又西南過平章縣南

地理志曰東平國故梁也景帝中和六年別為濟
 東國武帝元鼎元年為大河郡宣帝甘露二年為
 東平國王莽之有鹽城也章縣按世本任姓之國也齊

水經 卷之二十四 五
人降章者也故在無鹽城東北五十里汶水又西南有泌水注之水出肥縣東北自源西南流逕肥城縣故城南樂正子春謂其弟子曰子適齊過肥肥有君子焉左逕句窳亭北章帝元和二年鳳凰集肥城句窳亭後其祖而巡太山卽是亭也泌水又西南逕富城縣故城西王莽之成富也其水又西南流注於汶汶水又西南逕桃鄉縣故城西王莽之鄆亭也世以此爲鄆城非蓋因巨新之故目耳

又西南過無鹽縣南又西南過壽張縣北又西南至安民亭入于濟

汶水自桃鄉四分當其派別之處謂之四汶口其左二水雙流西南至無鹽縣之郈鄉城南魯叔孫昭伯之故邑也禍及鬪雞矣春秋左傳定公十二年叔孫氏墮郈今其城無南面汶水又西南逕其平陸縣故城北應劭曰古厥也今有厥亭汶水又西逕危山南世謂之龍山也漢書五行志曰哀帝時無鹽危山土自起覆草如馳道狀又報山石轉立晉灼曰漢注作報山山脇石一丈轉側起立高九丈尺六寸傍行一丈高四尺東平王雲及后謁

自之石所祭治石象報山立石束倍草并祠之建
平三年息夫躬告之王自殺后謁棄市國除漢書
石立宣帝起之象也汶水又西合爲一水西南入
茂都澱澱陂水之異名也澱水西南出謂之巨野
溝又西南逕致密城南郡國志曰須昌縣有致密
城古中都也卽夫子所宰之邑矣制養生送死之
節長幼男女之禮路不拾遺器不彫僞矣巨野溝
又西南入桓公河北水西出澱謂之臣良水西南
逕致密城北西南流注淇瀆次一汶西逕郈亭北
又西至壽張故城東遂爲澤渚初平三年曹公擊
黃巾於壽張東鮑信戰歿於此其右一汶西流逕
無鹽縣之故城南舊宿國也齊宣后之故邑所謂
無鹽醜女也漢武帝元朔四年封城陽恭王子劉
慶爲東平侯卽此邑也王莽更名之曰有鹽亭汶
水又西逕洽鄉城南地理志曰所謂無鹽有洽鄉
者也汶水西南流逕壽張縣故城北春秋之良縣
也縣有壽聚漢曰壽良應劭曰世祖叔母名良故
光武改曰壽張也建武十五年世祖封樊宏爲侯
國汶水又西南長直溝水注之水出須昌城東北
穀陽山南逕須昌城東又南漆溝水注焉水出無

水經第二十四
鹽城東北五里阜山下西逕無鹽縣故城北水側
有東平憲王倉冢碑闕存焉元和三年章帝幸東
平祀以太牢親拜祠坐賜御劔於陵前其水又西
流注長直溝溝水奇分爲二一水西逕須昌城南
入浦一水南流注於汶汶水又西流入浦故淮南
子曰汶出弗其西流合浦高誘云弗其山名在朱
虛縣東余按誘說是乃東汶非經所謂入沛者也
蓋其誤證耳

水經第二十四

水經第二十五

漢 桑 欽 撰

後魏 酈道元 注

明 吳中珩 校

泗水 沂水

泗水出魯卞縣北山

地理志曰出濟陰乘氏縣又云出卞縣北經言北
山皆爲非矣山海經曰泗水出魯東北余昔因公
事泂歷徐沅路逕洙泗因令尋其源流水出卞縣
故城東南桃墟西北春秋昭公七年謝息納季孫

之言以孟氏成邑與晉而遷于桃杜預曰魯國卞縣東南有桃墟世謂之曰陶墟舜所處也井曰舜井皆爲非也墟有澤澤方一十五里淥水微渟三丈如減澤西際阜俗謂之媯亭山蓋有陶墟舜井之言因復有媯亭之名矣阜則有三石穴廣圓三四尺穴有通瓦水有盈漏數夕之中則傾陂竭澤矣左右民居識其將漏預以木爲曲狀約鄆穴口魚鼈暴鱗不可勝載矣自此連岡通阜西北四十許里岡之西際便得泗水之源也博物志曰泗出陪尾蓋斯阜者矣石穴吐水五泉俱導泉穴各徑尺餘水源南側有一廟枯柏成林時則謂之原泉祠非所究也泗水西逕其縣故城南春秋襄公二十九年季武子取卞曰聞守卞者將叛臣率徒以討之是也南有姑蔑城春秋隱公元年公及邾儀父盟于蔑者也水出二邑之間西逕郚城北春秋文公七年經書公伐邾三月甲戌取須句遂城郚杜預曰魯邑也卞縣南有郚城備邾難也泗水自卞而會於洙水也

西南逕魯縣北

泗水又西南流逕魯縣分爲二流水側有一城爲

二水之分會也北爲洙瀆春秋莊公九年經書冬
浚洙京相璠曰杜預並言洙水在魯城北浚深之
爲齊備也南則泗水夫子教于洙泗之間今於城
北二水之中卽夫子領徒之所也從征記曰洙泗
二水交於魯城東北十七里闕里背洙泗牆南北
一百二十步東西六十步四門各有石闕北門去
洙水百步餘後漢初闕里荆棘自闕從講堂至九
里鮑永爲相因修饗祠以誅魯賊彭豐等郭緣生
言泗水在城南非也余按國語宣公夏濫於泗淵
里革斷罟棄之韋昭云泗在魯上北史記冢記王
隱地道記咸言葬孔子於魯城北泗水上今泗水
南有夫子冢春秋孔演圖曰鳥化爲書孔子奉以
告天赤爵銜書上化爲黃玉刻曰孔提命作應法
爲赤制說題辭曰孔子卒以所受黃玉葬魯城北
卽子貢廬墓處也譙周云孔子死後魯人就冢次
而居者百有餘家命曰孔里孔叢子曰夫子墓塋方
一里在魯城北六里泗水上諸孔氏封五十餘所
人名昭穆不可復識有銘碑三所獸碣具存皇覽
曰弟子各以四方奇木來植故多諸異樹不生棘
木刺草今則無復遺條矣泗水自城北南逕魯城

西南合沂水沂水出魯城東南尼丘山西北山卽
顏母所祈而生孔子也山東一十里有顏母廟山
南數里孔子父葬處禮所謂防墓崩者也平地發
泉流逕魯縣故城南水北東門外卽爰居所止處
也國語曰海鳥曰爰居止於魯城東門之外三日
臧文仲祭之展禽譏焉故莊子曰海鳥止郊魯侯
觴之奏以廣樂具以太牢三日而死此養非所養
矣門郭之外亦戎夷死處呂氏春秋曰昔戎夷違
齊如魯天大寒而後門與弟子宿於郭門外寒愈
甚謂弟子曰子與我衣我活我與子衣子活我國
士也爲天子惜子不肖人不足愛弟子曰不肖人
惡能與國士并衣哉戎歎曰不濟夫解衣與弟子
半夜而死沂水北對稷門昔圉人犖有力能投蓋
于此門服虔曰能投千鈞之重過門之上也杜預
謂走接屋之桶反覆門上也春秋僖公二十年經
書春新作南門左傳曰書不時也杜預曰本名稷
門僖公更高大之今猶不與諸門同故名高門也
其遺基猶在地八丈餘矣亦曰雩門春秋左傳莊
公十年公子偃請擊宋師竊從雩門蒙臯比而出
者也門南隔水有雩壇壇高三丈曾點所欲風舞

處也高門一里餘道西有道兒君碑是魯相陳君
立昔曾參居此梟不入郭縣卽曲阜之地少昊之
墟有大庭氏之庫春秋豎牛之所攻也故劉公幹
魯都賦曰戢武器於有災之庫放戎馬於巨野之
垆周成王封姬旦於曲阜曰魯秦始皇二十三年
以爲薛郡漢高后元年爲魯國阜上有季氏宅宅
有武子臺今雖崩夷猶高數丈臺西百步有大井
廣三丈深十餘丈以石壘之石似磬制春秋宣公
十二年公山不狃帥費攻魯公入季氏之宮登武
子之臺也臺之西北二里有周公臺高五丈周五
十步臺南四里許則孔廟卽夫子之故宅也宅大
一項所居之堂後世以爲廟漢高祖十三年過魯
以太牢祀孔子自秦燒詩書經典淪缺漢武帝時
魯恭王壞孔子舊宅得尚書春秋論語孝經時人
已不復知有古文謂之科斗書漢書秘之希有見
者于時聞堂上有金石絲竹之音乃不壞矣廟屋
三間夫子在西門東向顏母在中間南面夫人隔
東一間東向夫子牀前有石硯一枚作甚朴云平
生時物也魯人藏孔子所乘車於廟中是顏路所
請者也獻帝時廟遇火燒之永平中鍾離意爲魯

相到官出私錢萬三千文付戶曹孔訢治夫子車
身入廟拭几席劔履男子張伯除堂下草土中得
玉璧七枚伯懷其一以六枚白意意令主簿安置
几前孔子寢堂牀首有懸甕意名孔訢問何等甕
也對曰夫子甕也背有丹書人勿敢發也意曰夫
子聖人所以遺甕欲以懸示後賢耳發之中得素
書文曰後世修吾書董仲舒護吾車拭吾履發吾
笥會稽鍾離意壁有七張伯藏其一意卽名問伯
果服焉魏黃初二年文帝令郡國修起孔子舊廟
置百夫吏卒廟有夫子像列二弟子執卷立侍穆
穆有詢仰之容漢魏以來廟列七碑二碑無字括
柏猶茂廟之西北二里有顏母廟廟像猶嚴有修
栝五株孔廟東南五百步有雙石闕卽靈光之南
闕北百餘步卽靈光殿基東西二十四丈南北十
二丈高丈餘東西廊廡別舍中間方七百餘步闕
之東北有浴池方四十許步池中有釣臺方十步
池臺悉石也遺基尚整故王延壽賦曰周行數里
仰不見日者也是漢景帝程姬子魯恭王之所造
也殿之東南卽泮宮也在高門直北道西宮中有
臺高八十尺臺南水東西一百步南北六十步臺

水經 卷之二十一
西水南北四百步東西六十步臺池咸結石爲之
詩所謂思樂泮水也泮水又西逕圓丘北丘高四
丈餘泮水又西流昔韓雉射龍於斯水之上尸子
曰韓雉見申羊於魯有龍飲於泮韓雉曰吾聞也
出見虎搏之見龍射之今弗射是不得行吾聞也
遂射之泮水又西右注泗水者也

又西過瑕丘縣東屈從縣東南流濼水從東來注之
瑕丘魯邑春秋之負瑕矣襄公七年季康子伐邾
囚諸負瑕是也應劭曰瑕丘在縣西南昔衛大夫
公叔文子升於瑕丘蘧伯玉從文子曰樂哉斯丘
死則我欲葬焉伯玉曰吾子樂之則瑗請前刺其
欲害民良田也瑕丘之名蓋因斯以表稱矣曾子
弔諸負夏鄭玄皇甫謐並言衛地魯衛雖殊土則
一也濼水出東海合鄉縣漢和帝永寧九年封馬
光子復爲侯國其水西南流入邾春秋襄公二年
季孫斯伐邾取濼東田及泮西田是也濼水又逕
魯國鄒山東南而西南流春秋左傳所謂嶧山也
邾文公之所遷今城鄒山之陽依巖咀以墉固故
邾婁之國曹姓也叔梁紇之邑也孔子生於此後
乃縣之因鄒山之名以氏縣也王莽之鄒亭矣京

相璠曰地理志嶧山在鄒縣北繹邑之所依爲名也山東西二十里高秀獨出積石相臨殆無土壤石間多孔穴洞達相通往往有如數間屋處其俗謂之嶧孔遭亂輒將處人入嶧外寇雖衆無所施害永嘉中大尉郗鑒將鄉曲逃此山胡賊攻守不能得今山南有大嶧名曰郗公嶧山北有絕巖秦始皇觀禮於魯登於嶧山之上命丞相李斯以大篆勒銘山嶺名曰畫門詩所謂保有鳧嶧者也澮水又西南逕蕃縣故城南又西逕薛縣故城北地理志曰夏車正奚仲之國也竹書紀年梁惠成王三十一年邳遷于薛改名徐州城南山上有奚仲冢晉太康地記曰奚仲冢在城南二十五里山上百姓謂之神靈也齊封田文於此號孟嘗君有惠喻今郭側猶有文冢結石爲郭作制嚴固瑩麗可尋行人往還莫不逕觀以爲異見矣澮水又西逕仲虺城北晉太康地記曰奚仲遷於邳仲虺居之以爲湯左相其後當周爵稱侯後見侵削霸者所絀爲伯任姓也應劭曰邳存薛徐廣史記音義曰楚元王子郢以呂后二年封上邳侯也有下故此爲上矣晉書地道記曰仲虺城在薛城西三十里

九經 卷之二十五
灑水又西逕至湖陸縣入于泗故京相璠曰薛縣
灑水首受蕃縣西注山陽湖陸是也經言瑕丘東
誤耳

又南過平陽縣西

縣卽山陽郡之南平陽縣也竹書紀年曰梁惠成
王二十九年齊田盼及宋人伐我東鄙圍平陽者
也王莽改之曰黽平矣泗水又南逕故城西世謂
之漆鄉應劭十三州記曰漆鄉邾邑也杜預曰平
陽東北有漆鄉灑今見有故城西南方二里所未
詳也

又南過高平縣西洸水從北西來流注之

泗水南逕高平山山東西十里南北五里高四里
與衆山相連其山最高頂上方平故謂之高平山
縣亦取名焉泗水又南逕高平縣故城西漢宣帝
地節三年封丞相魏相爲侯國高帝八年封將軍
陳錯爲橐侯地理志曰縣故山陽之橐也王莽改
曰高平應劭曰章帝改按本志曰王莽更名章帝
因之矣所謂洸水者洙水也蓋洸洙相入受通稱
也

又南過方輿縣東

漢哀帝建平四年縣女子田無嗇生子先未生二月兒啼腹中及生不舉葬之陌上三日人過聞啼聲毋掘養之

荷水從西來注之

荷水卽沛水之所苞注以成湖澤也而東與泗水合於湖陵縣西六十里穀庭城下俗謂之黃水口黃水西北通巨野澤蓋以黃水沿注于荷故因以名焉

又屈東南過湖陸縣南洧洧水從東北來流注之

地理志曰故湖陸縣也荷水在南王莽更曰湖陸應劭曰尚書一名湖陵章帝封東平王蒼子爲湖陵侯更名湖陵也泗水又東逕郟鑿所築城北又東逕湖陸東城南昔桓溫北入也范曄擒慕容忠於此城東有度尚碑泗水又左會南梁水地理志曰水出蕃縣今縣之東北平澤出泉若輪焉發源成川西南流分爲二水北枝水西出逕蕃縣北西逕滕城北春秋左傳隱公十一年滕侯薛侯來朝爭長薛侯曰我先封滕侯曰我周之卜正也薛庶姓也我不可以後之公使羽父請薛侯曰君辱在寡人周諺有之曰山有木工則度之實有禮主則

擇之周之宗盟異姓爲後寡人若朝于薛不敢與
諸任齒君若辱貺寡人則願以滕君爲請薛侯許
之乃長滕侯者也漢高帝封夏侯嬰爲侯國號曰
滕公鄧晨曰今沛郡公丘也其水又漑於丘焉縣
故城在滕西北按地理志卽滕也周懿王子錯叔
繡文公所封也齊滅之秦以爲縣漢武帝元朔三
年封魯恭王子劉順爲侯國世以此水漑我良田
遂及百秭故有兩溝之名焉南梁水自枝渠西南
逕魯國蕃縣故城東俗以南隣於濶亦謂之西濶
水南梁水又屈逕城南應劭曰縣古小邾邑也地

理志曰其水西流注于沛沛在湖陸西而左注西
泗沛合流故地記或言沛入泗泗亦言入沛互受
通稱故有入沛之文闕駟十三州志曰西至湖陸
入泗是也經無南梁之名而有洧洧之稱疑卽是
水也戴延之西征記亦言湖陸縣之東南有洧洧
水亦無記於南梁謂是吳王所道之瀆也余按湖
陸西南止自是水延之蓋以國語云吳王夫差起
師將北會黃池掘溝於商魯之間北屬之沂西屬
于沛以是言之故是水爲吳王所掘非也余以水路
求之止自泗川耳蓋北達沂西北逕於商魯而接

於沛吳所浚廣耳非謂起自東北受沂西南注沛也假之有通非吳所趣年載誠眇人情厠近以今忖古知一延之之不通情理矣泗水又南瀟水注之又逕薛之上邳城西而南注者也

又南過沛縣東

昔許由隱於沛澤卽是縣也縣蓋取澤爲名宋滅屬楚左泗水之濱於秦爲泗水郡治黃水注之黃水出小黃縣黃鄉黃溝國語曰吳子會諸侯於黃池者也黃水東流逕外黃縣故城南張晏曰魏郡有內黃縣故加外也薛瓚曰縣有黃溝故縣氏焉

○圈稱陳留風俗傳曰縣南有渠水於春秋爲宋之曲棘里故宋之別都矣春秋昭公二十五年宋元公卒於曲棘是也宋華元居於穰里宣公十五年楚鄭圍宋晉解楊圍楚致命于此宋人懼使華元乘闔夜入楚師登子反之牀曰寡君使元以病告弊邑易子而食析骨以爨城下之盟所不能也子反退一舍宋楚乃平今城東闔上猶有華元祠祠之不輟城北有華元冢黃溝自城南東逕葵丘下春秋僖公九年齊桓公會諸侯于葵丘宰孔曰齊侯不務德而勤遠畧北伐山戎南伐楚西爲此會

東畧之不知西則否矣其有亂乎君務靖亂無勤於行晉侯乃還卽此地也黃溝又東注大澤蒹葭莞葦生焉卽世所謂大薺陂也陂有東北流逕定陶縣南

又東逕山陽郡

成武縣之楚丘亭北黃溝又東逕郟城北成武縣故城南王莽更之曰成安也黃溝又東北逕郟城北春秋桓公二年經書取郟大鼎于宋戊申納于大廟左傳曰宋督攻孔父而取其妻殺殤公而立公子馮以郟大鼎賂公臧僖伯諫爲非禮十三州

志曰今成武縣東南有郟城俗謂之北部者也黃溝又東逕平樂縣故城南又東右合洳水卽豐水之上源也水上承大薺陂東逕貫城北又東逕已氏縣故城北王莽之已善也縣有伊尹冢崔駰曰殷帝沃丁之時時伊尹卒葬于薄皇覽曰伊尹冢在濟陰已氏平利鄉皇甫謐曰伊尹年百餘歲而卒大霧三日沃丁葬以天子之禮親自臨喪以報大德焉又東逕孟諸澤杜預曰澤在梁國睢陽縣東北逕卽城縣故城南地理志曰山陽縣也王莽更名之曰郟城矣故世有南部北部之論也又東逕

單父故城南昔密子賤之治也孔子使巫馬期觀政入其境見夜漁者問曰子得魚輒放何也曰小者吾大夫欲長育之故也子聞之曰誠彼形此子賤得之善矣惜哉不齊所治者小也王莽更名斯縣爲利善矣世祖建武十三年封劉茂爲侯國又東逕平樂縣右合泡水水上承淮水於下邑縣界東北注一水上承淮水於杼秋縣界北流世又謂之瓠盧溝水積爲渚渚水東北流二渠雙引左合澧水俗謂之二泡也自下澧泡並得通稱矣故地理志曰平樂侯國也泡水所出又逕豐西潭謂之豐水漢書稱高祖送徒麗山徒多亾到豐西澤有大蛇當徑拔劒斬之此卽漢高祖斬蛇處也又東逕大偃水分爲二又東逕豐縣故城南王莽之吾豐也水側城東北流右合枝水上承豐西大偃派流東北逕豐城北東注澧水澧水又東合黃水時人謂之狂水蓋狂黃聲相近俗傳失實也自下黃水又兼通稱矣水上舊有梁謂之泡橋王智深宋史云宋太尉劉義恭於彭城遣軍正稽玄敬北至城覘候魏軍魏軍於清西望見玄敬士衆魏南康侯杜道儁引趣泡橋沛縣民逆燒泡橋又於林中

打鼓儻謂宋軍大至爭渡泡水水深酷寒凍溺死者殆半清水卽泗水之別名也沈約宋書稱魏軍欲渡清西非也泡水又東逕沛縣故城南秦末兵起蕭何曹參迎漢祖於此城高帝十一年封合陽侯劉仲子爲侯國城內有漢高祖廟廟前有石碑後漢立廟基以青石爲之階陛尚存劉備之爲徐州也治此袁術遣紀靈攻備備求救呂布布救之屯小沛招靈請備共飲布謂靈曰玄德布弟也布性不熹合鬪但熹解鬪乃植戟於門布彎弓曰觀布射戟小支中者當各解兵不中可留決鬪一發中之遂解此卽布射戟支處也述征記曰城極大四周漸通豐水豐水於城南東注泗卽泡水也地理志曰泡水自平樂縣東北至沛入泗者也泗水南逕小沛縣東縣治故城南垞上東岍有泗水亭漢祖爲泗水亭長卽此亭也故亭今有高廟廟前有碑延熹十年立廟闕崩禡畧無全者水中有故石梁處遺石尚存高祖之破黥布也過之置酒沛宮酒酣歌舞慷慨傷懷曰遊子思故鄉也泗水又東南流逕廣戚縣故城南漢武帝元朔元年封劉澤爲侯國王莽更之曰力聚也泗水又逕留縣

而南逕垞城東城西南有崇侯虎廟道淪遺愛不知何因而遠有此圖泗水又南逕宋大夫桓魋冢西山抗泗水上而盡石鑿而爲冢今人謂之石郭者也郭有二重石作工巧夫子以爲不如死之速朽也

又東南過彭城縣東北

泗水西有龍華寺是沙門釋法顯遠出西域浮海東還持龍華圖首創此制法流中夏自法顯始也其所持天基二石仍在南陸東基堪中其石尚尙光潔可愛泗水又南淮水入焉而南逕彭城縣故城東周顯王四十二年九鼎淪沒泗淵秦始皇時而鼎見於斯水始皇自以德合三代大熹使數千人投水求之不得所謂鼎伏也亦云系而行之未出龍齒齧斷其系故語曰稱樂大早絕鼎系當是孟浪之傳耳泗水又逕龔勝墓南墓碣尚存又經亞父冢東皇覽曰亞父冢在廬江縣郭東居巢亭中有亞父井吏民親事皆祭亞父於居巢廳上後更造祠於郭東至今祠之按漢書項羽傳歷陽人范增未至彭城而發疽死不言之居巢今彭城南有項羽掠馬臺臺之西南山麓上卽其冢也增不慕范蠡

之舉而自絕於斯可謂褊矣推考書墓事近於此也

又東南過呂縣南

呂宋邑也春秋襄公元年晉師伐鄭及陳楚子辛救鄭侵宋呂留是也縣對泗水漢景帝三年有白頸烏與黑烏羣鬪於縣白頸烏不勝墮泗水中死者數千京房易傳曰逆親親厥妖白黑烏鬪時有吳楚之反泗水之上有石梁焉故曰呂梁也昔宋景公以共工之弓彎弧東射矢集彭城之東飲羽於石梁卽斯梁也懸濤崩湊實爲泗嶮孔子所謂

魚鼈不能游又云懸水三十仞流沫九十里今則不能也蓋惟嶽之喻未便極天明矣晉太康地記曰水出磬石書所謂泗濱浮磬者也泗水又東南流丁溪水注之溪水上承泗水於呂縣東南流北帶廣隰山高而注于泗川泗水冬春淺澁常排沙通道是以行者多從此溪卽陸賦所云乘丁水之捷岸排泗川之積汝者也晉太元九年左將軍謝玄於呂梁遣督護聞人奭用工九萬擁水立七拖以利運漕者

又東南過下邳縣西

泗水歷縣逕葛嶧山東卽奚仲所遷邳嶧者也泗水又東南逕下邳縣故城西東南流沂水流納注焉故東海屬縣也應劭曰奚仲自薛徙居之故曰下邳也漢徙齊王韓信爲楚王都之後乃縣焉王莽之閏儉矣東陽郡治文潁曰秦嘉東陽郡今下邳是也晉灼曰東陽縣本屬臨淮郡明帝分屬下邳後分屬廣陵故張晏曰東陽郡今廣陵郡也漢明帝置下邳郡矣城有三重其大城中有司馬石苞鎮東將軍胡質司徒王渾監軍石崇四碑南門謂之白門魏武擒陳宮於此處矣中城呂布所守也小城晉中興北中郎將荀羨郗曇所治也昔太伯山吳伯武少孤與弟文章相失二十餘年遇於縣市文章欲毆伯武心神悲慟因相尋問乃兄弟也縣爲沂泗之會也又有武原水注之水出彭城武原縣西北會注陂南逕其城西王莽之樂亭也縣東有徐廟山山因徐徙以卽名之也山上有石室徐廟也武原水又南合武水謂之泐水南逕剛亭城又南至下邳入泗謂之武原水口也又有桐水出西北東海容丘縣東南至下邳入泗泗水東南逕下相縣故城東王莽之從德也城之西北有漢

水經 卷之二十五
太尉陳球墓墓前有三碑是弟子管寧華歆等所造初平四年曹操攻徐州破之拔取慮睢陵夏丘等縣以其父避難被害於此屠其男女十萬泗水爲之不流自是數縣人無行跡亦爲累矣泗水又東南得睢水口泗水又逕宿預城之西又逕其城南故下邳之宿留縣也王莽更名之曰康義矣晉元皇之爲安東也督運軍儲而爲邸閣也魏太和中南徐州治後省爲戍梁將張惠紹北入水軍所次憑固斯城更增修郭塹其四面引水環之今城在泗水之中也

又東南入于淮

泗水又東逕陵柵南西征記曰舊陵縣之治也泗水又東南逕淮陽城城北臨泗水昔菑丘訢飲馬斬蛟眇目於此處也泗水又東南逕魏陽城北城枕泗川陸機行思賦曰行魏陽之枉渚故無魏陽疑卽泗陽縣故城也王莽之所謂淮平亭矣蓋魏文帝幸廣陵所由或因變之未詳也泗水又東逕角城北而東南流注于淮考諸地說或言泗水於睢陵入淮亦云於下相入淮皆非實錄也

沂水出泰山蓋縣艾山

水經

卷之二十五

五

鄭玄云出沂山亦或云臨樂山水有三源南源所
導世謂之柞泉屯水所發俗謂之魚窮山俱東南
流合成一川右會洛預水水出洛預山東北流注
之沂水東南左合桑預水水北出桑預山東流于
沂水沂水又東南螳螂水入焉出魯山東南流右注
沂水水又東逕蓋縣故城南東會連綿之水水發
連綿山南流逕蓋城東而南入沂沂水又東逕浮
來之山春秋經書公及莒人盟于浮來者也卽公
來山也在邳鄉西故號曰邳來之間也浮來之水
注之其水左控三川右會甘水而注于沂沂水又
南逕爆山西山有二峰相去一里雙巒齊秀負峙
若一沂水又東南逕東苑縣故城西與沂水合孟
康曰縣故鄆邑今鄆亭是也漢武帝元朔二年封
城陽共王第吉爲東苑侯魏文帝黃初中立爲東
苑郡東燕錄謂之團城劉武帝北伐廣固登之以
聖王難魏南青州治左氏傳曰莒魯爭鄆爲日多
矣今城北鄆亭是也京相璠曰琅邪姑幕縣南四
十里負亭故魯鄆邑世變其字非也郡國志東苑
有鄆亭今在團城東北四十里猶謂之故東苑城
矣小沂水出黃孤山西南流逕其城北西南注于

沂沂水又南與閭山水合出閭山山東南流右佩
二水總歸于沂沂水南逕東安縣故城東而南合
時密水水出時密山莒地莒人歸其仲于魯及密
而死是也密水東流逕東安城南漢封魯孝王子
強爲東安郡密水又東南流入沂沂水又南桑泉
水北出五女山東南流巨圍水注之水出巨圍之
山東南注于桑泉水桑泉水又東南堂阜水入焉
其水導源堂阜春秋莊公九年管仲請囚鮑叔受
之及堂阜而稅之杜預曰東莞蒙陰縣西北有夷
吾亭者是也堂阜水又東南注桑泉水桑泉水又
東南逕蒙陰縣故城北王莽之蒙恩也又東南與
雙崗水合水有二源雙會東導一川俗謂之汶水
也東逕蒙陰縣注桑泉水又南東盧川水注之水
出鹿嶺山東南流左則二川臻湊右則諸葛泉源
斯奔亂流逕城陽之盧縣故蓋縣之盧上里也漢
武元朔二年封城陽共王弟劉稀爲侯國王莽更
名之曰著善矣又東南注于桑泉水桑泉水又東
南右合蒙陰二水水出蒙陰山東北流昔琅邪承
宮避亂此山立性好仁不與物競人有認其忝者
捨之而去其水東北流入于沂沂水又南逕陽都

縣故城東縣故陽國也齊同盟齊利其地而遷之者也漢高帝六年封將軍丁復爲侯國沂水又南與蒙山水合水出蒙山之陰東流逕陽都縣南東注沂水沂水又左合溫水水上承溫泉陂而西南入于沂水者也

南過琅邪臨沂縣東又南過開陽縣東

沂水南逕中丘城西春秋隱公七年夏城中丘左傳曰書不時也沂水又南逕臨沂縣故城東郡國志曰琅邪有臨沂縣故屬東海郡有洛水注之水出太山南武陽縣之冠石山地理志曰冠石山洛水

所出應劭地理風俗志曰武水出焉蓋水異名也東流逕蒙山下有蒙祠洛水又東南逕顓臾城北郡國志曰縣有顓臾城季氏將伐之孔子曰昔者先王以爲東蒙主社稷之臣也何以伐爲冉有曰今夫顓臾固而便近於費者也洛水又東南流逕費縣故城南地理志東海之屬縣也爲魯季孫之邑子路將墮之公山弗擾師襲魯弗克後季氏爲陽虎所執弗擾以費畔卽是邑也漢高帝六年封陳賀爲侯國王莽更名之曰順從也許慎說文云沂水出東海費縣東西入泗從水斤聲呂忱字林

亦言是矣斯水東南所注者沂水在西不得言東南
南趨也皆爲謬矣故世俗謂水爲小沂水洛水又
東南逕祊城南春秋隱公八年鄭伯請釋太山之
祀而祀周公使宛歸泰山之祊而易許田杜預釋
地曰祊鄭祀泰山之邑也在琅邪費縣東南洛水又
東南流注于沂沂水又南逕開陽縣故城東縣故
邾國也春秋左傳昭公十八年邾人襲邾盡俘以
歸邾子曰余無歸矣從擊于邾是也後更名開陽
矣春秋哀公三年經書季孫斯叔孫州仇帥師城
啓陽者是矣縣故琅邪郡治也

又東過襄賁縣東屈從縣南四流又屈南過剡縣曰
魯連子稱陸子謂齊潛王曰魯費之衆臣甲舍于
襄賁者也王莽更名章信也剡故國也少昊之後
春秋昭公十七年剡子朝嘗公與之宴昭子叔孫
媯問曰少昊鳥名官何也剡子曰吾祖也我知之
黃帝炎帝以雲火紀官太皞以龍紀少皞瑞鳳鳥
統歷鳥官之司議政斯在孔子從而學焉旣而告
人曰天子失官學在四夷者也竹書紀年晉烈公
四年越子末句滅郟以郟子鳩歸縣故舊魯也東
海郡治秦始皇以爲郟郡漢高帝二年更從今名

卽王莽之沂平者也

又南過良城縣西又南過下邳縣西南入于泗

春秋左傳曰昭公十三年秋晉侯會吳子于良吳子辭水道不可以行晉乃還是也地理志曰良成王莽更名承翰矣沂水於下邳縣北西流分爲二水一水於城北西南入泗一水逕城東屈從縣南亦注泗謂之小沂水水上有橋徐泗間以爲圯昔張子房遇黃石公於圯上卽此處也建安二年曹操圍呂布於此引沂泗灌城而擒之

洙水出泰山蓋縣臨樂山

地理志曰臨樂山洙水所出西北至蓋入泗水或作池字蓋字誤也洙水自山西北逕蓋縣漢景帝中元五年封后兄信爲侯國又西逕泰山東平陽縣春秋宣公八年冬城平陽杜預曰今泰山平陽縣是也河東有平陽以此加東矣晉武帝元康九年改爲新泰縣也

西南至卞縣入于泗

洙水西南流盜泉水注之泉出卞城東北卞山之陰尸子曰孔子至於暮矣而不宿於盜泉渴矣而不飲惡其名也故論撰考讖曰水名盜泉仲尼不

水經 卷之二十一
漱卽斯泉矣西北流注于洙水洙水又西南流于
卞城西西南泗水亂流西南至魯縣東北又分爲
二水水側有故城兩水之分會也洙水西北流逕
孔里此是謂洙泗之間矣春秋之浚洙非謂始導
矣蓋深廣之耳洙水又西南枝津出焉又南逕瑕
丘城東而南入石門門左結石爲水門跨於水上
也西南流世謂之杜武瀋洙水又西 至南平陽縣
之顯閭亭西邾邑也春秋襄公二十一年經書邾
庶期以漆閭丘來奔者杜預曰平陽北有顯閭亭
十三州記曰山陽南平嘔縣又有閭丘鄉從征記

曰杜謂顯閭丘也今按漆鄉在縣東北漆鄉東北
十里見有閭丘鄉顯閭非也然則顯閭自是別亭
未知孰是又南洙水注之呂忱曰洙水出東平上
水汶水於岡縣西闡亭東爾雅曰汶別爲闡其曰
洛之波矣洙水西南流逕盛鄉城西京相璠曰岡
縣西南有盛鄉城者也又南逕太山寧陽縣故城
西漢武帝元朔三年封魯共王子劉恬爲侯國王
莽改之曰寧順也又南洙水枝津注之水首受洙
西南流逕瑕丘城北又西逕寧陽城南又西南入
于洙水洙水又西南逕太山郡乘丘縣故城東趙

水經卷之二十五
肅侯二十年韓將舉與齊魏戰于乘丘卽此縣也
漢武帝元朔五年封中山靖王子劉將夜侯國也
洸水又東南流注于洙水又南至高平南入于泗
水西有茅鄉城東去南平三十里京相璠曰今高
平縣西三十里有故茅鄉城者也

水經第二十五

水經第二十六

漢 桑 欽 撰

後魏 酈 道 元 注

明 吳 中 珩 校

沫水

巨洋水

淄水

汶水

濰水

膠水

沫水出琅邪東莞縣西北山

大棄山與小太山連麓而異名也引控衆流積以
成川東南流逕邳鄉南南去縣八十許里城有三
面而不周於南故俗謂之半城沫水又東南流左

水經 卷之三十六
右峴水水北出大峴山東南流逕邳鄉東東南流注于沫水也

東南過其縣東

沫水左與箕山之水合水出東諸縣西箕山劉澄之以爲許由之所隱也更爲巨謬矣其水西南流注于沫水也

又東南過莒縣東

地理志曰莒子之國盈姓也少昊後列女傳曰齊人杞梁殖襲莒戰歿其妻將赴之道逢齊桓公公將弔之杞梁妻曰如殖有罪君何辱命焉如殖無罪有先人之弊廬在下妾不敢與郊弔公旋車弔諸室妻乃哭於城下七日而城崩故琴操云殖歿妻援琴作歌曰樂莫樂兮新相知悲莫悲兮生別離哀感皇天城爲之墜卽是城也其城三重並悉崇峻唯南開一門內城方十二里郭周四十許里尸子曰莒君好鬼巫而國亾無知之難小白奔焉樂毅攻齊守嶮全國秦始皇縣之漢興以爲城陽國封朱虛侯章治莒王莽之莒陵也光武合城陽國爲琅邪國以封皇子京雅好宮室窮極伎巧壁帶飾以金銀明帝時京不安莒移治間陽矣沫水

又南表公水東出清山尋坤維而注沭沭水又南
潯水注之水出於巨公之山西南流舊竭以溉渚
田東西二十里南北十五里潯水又西南流入沭
沭水又南與葛陂水會水發三注山西南流逕辟城
城南世謂之辟陽城史記建元以來王子侯者年
表曰漢武帝元朔二年封城陽共王子節侯劉壯
爲侯國也其水於邑積以爲陂謂之辟陽湖西南
流注于沭水也

又南過陽都縣東入于沂

沭水自陽都縣又南會武陽溝水水東出倉山山
上有故城世謂之監官城非也卽古有利城矣漢
武帝元朔四年封城陽共王子劉釘爲侯國也其
城因山爲基水導山下西北流謂之武陽溝又西
至卽丘縣注于沭沭水又南逕東海郡卽丘縣故
春秋之祝丘也桓公五年經書齊侯鄭伯如紀城
祝丘左傳曰齊鄭朝紀欲襲之漢立爲縣王莽更
之就信也郡國志曰自東海分屬琅邪闕駟曰郎
祝魯之音蓋字承讀變矣沭水又南逕東海厚丘
縣王莽更之祝其亭也分爲二瀆西南出今無水
世謂之枯水一瀆南逕建陵縣故城東漢景帝八

年封石綰爲侯國王莽更之曰付亭也沫水又南
逕陵山西魏正元中齊王之鎮徐州也立大堰遏
水西流兩瀆之會置城防之曰曲沫戍自流三十
里西注沫水舊瀆謂之新渠自厚丘西南出左會
新渠南入淮陽宿預縣注泗水地理志所謂至下
邳注泗者也經言於陽都入沂非矣沫水左瀆自
大堰水斷故瀆東南出桑堰水注之水出襄賁縣
泉流東注沫瀆又南左合橫溝水水發瀆右東入
沫之故瀆又南暨于堰其水西南流逕司吾山東
又逕司吾縣故城西春秋左傳楚執鍾吾子以爲
司吾縣王莽更之息吾也又西南至宿預注泗水
也沫水故瀆自下堰東南逕司吾城東又東南歷
祖口城中祖水出於楚之祖地春秋襄公十年經
書公與晉及諸侯會吳于祖京相璠曰宋地今彭
城偃陽縣西北有祖水溝去偃陽八十里東南流
逕偃縣故城東北地理志曰故偃陽國也春秋左
傳襄公十年夏四月戊午會于祖晉荀偃士匄請
伐偃陽而封宋向戌焉荀瑩曰城小而固勝之不
武弗勝爲笑固請丙寅圍之弗克孟氏之臣秦堇
父輦重如役偃陽人啓門諸侯之士門焉縣門發

鄴人紇抉之以出門者狄虓彌建大車之輪而蒙之以甲以爲櫓左執之右拔戟以成一隊孟獻子曰詩所謂有力如虎者也主人縣布堇父登之及堞而絕之墜則又縣之蘇而復上者三主人辭焉乃退帶其斷以徇於軍三日諸侯之師久於偃陽請歸智伯怒曰七日不克爾乎取之以謝罪也偃士攻之親受矢石遂滅之以偃陽子歸獻子于武宮謂之夷俘偃陽妖姓也漢以爲縣漢武帝元朔三年封齊孝王子劉就爲侯國王莽更之輔陽也郡國志曰偃陽有祖水祖水而南亂于沂而注于沭謂之祖口城得其名矣東南至煦縣入游注海也

巨洋水出朱虛縣泰山北過其縣西

泰山卽東小泰山也巨洋水卽國語所謂具水矣袁宏謂之巨昧王韶之以爲巨曩亦或曰胸瀾皆一水也而廣其目焉其水北流逕朱虛縣故城西漢惠帝二年封齊悼惠王子劉章爲侯國地理風俗記曰丹山在西南丹水所出東入海丹水由朱虛丘阜矣故言朱虛城西有長坂遠峻名爲破車峴城東北二十里有丹山世謂之几山縣在西南

非山也丹凡字相類音從字變也山導丹水有二源各導一山世謂之東丹西丹水也西丹自穴山北流逕劇縣故城東東丹水注之出方山山有三水一水卽東丹水也北逕縣合西丹水而亂流又東北出逕洺薄澗北洺水亦出方流入平壽縣積而爲渚水盛則北■東南流屈而東北流逕平壽縣故城西而北入丹謂之魚合口丹水又東北逕望臺東東北注海蓋亦縣所氏者也

又北過臨朐縣東

巨洋水自朱虛北入臨朐縣熏冶泉水注之水出西谿飛泉側瀨於窮坎之下泉谿之上源麓之側有一祀目之爲冶泉祀按廣雅金神謂之清明斯地蓋古冶官所在故水取稱焉水色澄明而清冷特異淵無潛石淺鏤沙文中有古壇參差相對後人微加功飾以爲嬉遊之處南北邃岍凌空疎木交合先公以太和中作鎮海岱余總角之年持節東州至若炎夏火流閑居倦想提琴命友嬉娛永日桂筍尋派輕林委浪琴歌旣洽懽情亦暢是焉棲寄實可憑衿小東有一湖佳饒鮮筍匪直芳齊芍藥實亦潔並飛鱗其水東北流入巨洋謂之熏

治泉又逕臨朐縣故城東城古伯氏駢邑也漢武
 帝元朔二年封菑川懿王子劉奴侯國應劭曰臨
 朐山名也故縣氏之朐亦水名其城側川臨朐是
 以王莽用表厥稱焉其城上下泂水悉是劉武皇
 北伐廣固營壘所在矣巨洋又東北逕委粟山東
 孤阜秀立形若委粟又東北洋水注之水西出石膏
 山西北石澗口東南逕逢山下祠西洋水又南東
 歷逢山下即石膏山也麓三成壁立直上山上有
 石鼓鳴則年凶郭緣生續述征記曰逢山在廣固
 南三十里有祠并石鼓齊地將亂石人輒打石鼓

一聞數十里洋水歷其陰而東北流世謂之石溝水
 一東北流出於委粟山北而東注于巨洋謂之石溝
 曰然是水下流亦有時通塞及其春夏水泛川瀾
 無輟亦或謂之為龍泉水地理志石膏山洋水是
 出也今於此縣唯是瀆當之似符羣證矣巨洋又
 東北得邳泉口泉源西出平地東流注于巨洋巨
 洋又北會建德水水西發逢山阜而東流入巨洋
 水也

又北過劇縣西

巨洋水又東北合康浪水水發縣西南嶼山無事

樹木而負峭孤峙巘岈分立左思齊都賦曰嶷嶺其左是也康浪水北流注於巨洋巨洋又東北逕劇縣故城西古紀國也春秋莊公四年紀侯不能下齊以與弟季大去其國違齊難也後改曰劇故魯連子曰胸劇之人辯者也漢文帝十八年別爲菑川國後并北海漢武帝元朔二年封菑川懿王子劉錯爲侯國王莽更之愈縣也城之北側有故臺臺西有方地晏謨曰西去齊城九十七里耿弇破張步於臨淄追至巨洋水上僵尸相屬卽是水也巨洋又東北逕晉龍驤將宣幽州刺史辟閭渾墓東而東北流渾側有一墳甚高大時人咸謂之爲焉陵而不知誰之丘壟也巨洋水又東北逕益縣故城東王莽更之滌蕩也晏謨曰南去齊城五十里司馬宣王伐公孫淵北徙豐人住於此城遂改名爲南豐城也又東北積而爲潭枝津出焉謂之百尺溝西北流逕北益都城也漢武帝元朔三年封菑川懿王子劉胡爲侯國又西北流而注于巨淀矣

又東北過壽光縣西

巨洋水自湖東北流逕縣故城西王莽之翼平亭

也漢光武建武二年封更始子鯉爲侯國城之西
南水東有孔子石室故廟堂也中有孔子像弟子
問經旣無碑誌未詳所立巨洋又東北流堯水注
之水出劇縣南有崩山卽故義山也俗人以其山
角因名爲角崩山亦名爲角林山皆世俗音譌也
水卽蕤水矣地理志曰劇縣有義山蕤水所出也
北逕嶼山東俗亦名之爲青水矣堯水又東北逕
東西壽光二城間應劭曰壽光縣有灌亭杜預曰
在縣東南斟灌國也又言斟亭在平縣壽東南平
壽故城在白狼水西今北海郡治水上承營陵縣
之下流東北逕城東西入別畫湖亦曰朕懷湖湖
東西二十里南北三十里東北入海斟亭在漑水
東水出桑犢亭東覆醜山亭故高密郡治世謂之
故郡城山謂之塔山水曰鹿孟水亦曰戾孟水皆
非也地理志曰桑犢故亭北海之屬縣矣有覆醜
山漑水所出北逕斟亭西北今日狼水按地理志
北海有斟縣京相璠曰故斟尋國禹後西北去灌
亭九十漑水又北逕寒亭西郡國志曰平壽有斟
灌東薛瓚漢書集注云按汲郡古文相居斟灌東
郡灌是也明帝以封周後改曰衛斟尋在河南非

平壽也又云太康居斟尋羿亦居之桀又居之尚
書序曰太康失國兄弟五人徙于洛汭此卽太康
之居爲近洛也余考瓚所據今河南有尋也衛國
有觀土國語曰啓有五觀謂之姦子五觀蓋其名
也所處之邑其名曰觀皇甫謐曰衛也又云夏相
徙南丘依同姓之諸侯于斟灌斟尋氏卽汲冢書
云相居斟灌也旣依斟尋明斟尋非一居矣窮后
旣仗善射篡相韓浞亦因逢蒙弑羿卽其居以生
澆因其室而有殪故春秋公四年魏絳曰澆用
師滅斟灌及斟尋氏處澆於過處殪于戈是以伍
員言於吳子曰過澆殺斟灌以伐斟尋是也有夏
之遺臣曰靡事羿羿之歿也逃于隔氏今隔縣也
收斟灌尋二國之餘燼殺韓浞而立少康滅之有
窮遂亾也是蓋寓其居而生其稱宅其業而表其
邑縱遺文泐禡亭郭有傳未可以彼有灌目謂此
專此爲捨此尋名而專彼爲是以上推傳應氏之
據亦可按矣堯水又東北注巨洋伏琛晏謨並言
堯嘗頓駕於此故受名焉非也地理志曰蕤水自
劇東北至壽光入海泂其逗颺卽是水也
又東北入于海

巨洋水東北逕望海臺西東北流伏環晏謨並以
為平望亭在平壽縣故城西北八十里古縣又或
言秦始皇升以望海因曰望海臺未詳也按史記
漢武帝元朔二年封菑川懿王子劉賞為侯國又
東北注于海也

淄水出泰山萊蕪縣原山

淄水出縣西南山下世謂之原泉地理志曰原山
淄水所出故經原山之論矣淮南子曰水出自飴
山蓋山別名也東北流逕萊蕪谷屈而西北流逕
其縣故城南從征記曰城在萊蕪谷當路咀絕兩

山間道由南北門漢末有范史雲為萊蕪令言萊
蕪在齊非魯所得引舊說云齊靈公滅萊萊民播
流此谷邑落荒蕪故曰萊蕪禹貢所謂萊夷也夾
谷之會齊侯使萊人以兵劫魯侯宣尼稱夷不亂
華是也余按太無萊祚並山名也郡縣取目焉漢
高祖置左傳曰與之無山及萊祚是也應劭十三
州記曰太山萊蕪縣魯之萊祚邑淄水又西北轉
逕城西又東北流與一水合水出縣東南俗謂之
家桑谷水從征記名曰聖水列仙傳曰鹿皮公者
淄川人也少為府小史才巧舉手成器岑山上有

神象人不能到小史白府君請木工斧三十人作
轉輪造縣閣意思橫生數十日梯道成上其嶺作
祠屋留止其傍其二間以自固食芝華飲神泉七
十餘年溜水未下呼宗族得六十餘人命上山半
水出盡漂一郡沒者萬計小史辭遣宗室令下山
著鹿皮衣升閣而去後百餘年下賣藥齊市也其
水西北流注溜水溜水又北出山謂之萊蕪口東
北流者也

又東北過臨淄縣東

淄水自山東北流逕牛山西又東逕臨淄縣故城
南東得天齊水口水出南郊山下謂之天齊淵五
泉並出南北三百步廣十步山卽牛山也左思齊
都賦曰牛頓鎮其南者也水在齊八祠中齊之爲
名起於此矣地理風俗記曰齊所以爲齊者卽天
齊淵名也其水北流注於淄水又東逕四豪冢北
水南山下有四冢方基員墳咸高七尺東西直列
是田氏四王家也淄水又東北逕陽陰里西水東
有冢一基三墳東西八十步是烈士公孫接田開
疆古冶子之墳也晏子惡其勇無禮投桃以斃之
外葬陽里卽此也淄水又北逕其城東城臨淄水

故曰臨淄王莽之齊陵縣也爾雅曰水出其前左
爲營丘武王以其地封太公望賜之以四履都營
丘爲齊或以爲都營陵史記周成王封師尚父于
營丘東就國道宿行遲萊侯與之爭營丘逆旅之
人曰吾聞時難得而易失客寢安殆非就封者也
太公聞之夜衣而行至營丘陵亦丘也獻公自營
丘徙臨淄余按營陵城南無水唯城北有一水世
謂之白狼水西出丹山俗謂凡山也東北流山爾
雅出前左之文不得以爲營丘矣營丘者山名也
詩所謂子之營兮遭我乎徕之間兮作者多以丘
陵號同又去萊羌近咸言太公所封考之春秋經
書諸侯城緣陵左傳曰遷杞也毛詩鄭注並無營
字瓚以爲非近之今臨淄城中有丘在小城內周
迴三百步高九丈北降丈五淄水出其前故有營
丘之名與爾雅相符城對天齊淵故城有齊城之
稱是以晏子言始爽鳩氏居之逢伯陵居之太公
居之又曰先君太公築營之丘季札觀風聞齊音
曰泱泱乎大風也哉表東海者其太公乎回巴入
齊過淄自鏡郭景純言齊之營丘淄水逕其南及
東也非營陵明矣獻公之徙其猶晉氏深翼居絳

非謂自營陵而之也其外郭卽獻公所徙臨淄城也世謂之虜城言齊湣王伐燕燕王噲歿虜其民寶居因郭以名之秦始皇三十四年滅齊爲郡治臨淄漢高六年封子肥於齊爲王國王莽更名濟南也戰國策曰田單爲齊相過淄水有老人涉淄而出不能行坐沙中單乃解裘於斯水之上也

又東過利縣東

淄水自縣東北流逕東安平城北又東逕巨淀縣故城南征和四年漢武帝幸東萊臨大海三月耕巨淀卽此也縣東南則巨淀湖蓋以水受名也淄

水又東北逕廣饒縣故城南漢武帝元鼎中封菑川靖王子劉國爲侯國淄水又東北馬車瀆水注之受巨淀淀卽濁水所注也呂忱曰濁水一名溷水出廣縣爲山世謂之治嶺山東北流逕廣固城西城在廣縣西北四里四周絕澗咀水深隍晉永嘉中東萊人曹嶷所造也水側山際有五龍口義熙五年劉武帝伐慕容超於廣固也以藉嶮難攻兵力勞弊河間人玄文說裕云昔趙攻曹嶷望氣者以爲繩水帶城非可攻拔若塞五龍口城當必陷石虎從之疑請降降後五日大雨雷電震開後

慕容恪之攻拔龕十旬不拔塞城而龕降降後無
幾又震開之舊基猶存宐城修築裕塞之超及城
內男女皆悉腳弱病者大半超遂出奔爲晉所擒
也然城之所跨實憑地嶽其不可固城者在此濁
水東北流逕堯山東從征記曰廣固城北三里有
堯山祠堯因巡狩登此山後人遂以名山廟在山
之左麓廟像東面華宇修整帝圖嚴飾軒冕之容
穆然山之上頂舊有上祠今也毀廢無復遺式盤
石上尚有人馬之跡徒黃石而已唯刀劍之蹤逼
真矣至於燕鋒代鏐魏鉞齊銘與今劍莫殊以密
模寫知人功所制矣西望胡公陵孫暢之所云青
州刺史傅弘仁言得銅棺隸書處濁水又東北流
逕東陽城北東北流合長沙水水出逢山北阜世
謂之陽水也東北流逕廣縣故城西舊有州刺史
治亦曰青州城陽水又東北流石井水注之水出
南山頂洞開望若門焉俗謂是山爲磬頭山其水
北流注井井際廣城東側二面積石高深一匹有
餘長津激浪瀑布而下澎轟之音驚川聒谷滿漭
之勢狀同洪井北流入陽水余生長東齊極遊其
下於中闊絕乃積綿載後因王事復出海岱郭金

紫惠同石井賦詩言意彌日嬉娛尤慰羈心但恨
此水時有通塞耳陽水東逕故七級寺禪房南水
北則長廡徧駕迴閣承阿林之際則繩坐疏班錫
鉢閒設所謂修修釋子眇眇禪棲者也陽水又東
東逕陽城東南義熙中晉青州刺史羊穆之築此
以在陽水之陽卽謂城之東陽城世以濁水爲西
陽水故也水流亦有時窮通信爲靈矣昔在宋世
是水絕而復流劉晃賦通津焉魏太和中此水復
竭輟流積年先公滁州卽任未暮是水復通澄映
盈川所謂幽谷枯而更溢窮泉輟而復流矣海岱
之士又頌通津焉平昌耆民孫道相頌曰唯彼繩
泉竭踰三齡祈盡珪璧謁窮斯牲道從隆替降由
聖明耆民河間趙嶷頌云敷化未暮玄澤潛施枯
源揚瀾涸川滌陂北海郭欽曰先政輟津我后通
洋但頌廣文煩難以具載陽水又北屈逕漢城陽
景王劉章廟東東注于巨洋後人竭斷令北注濁
水時人通謂濁水爲陽水故有南陽北陽水之論
二水渾流世謂之爲長沙水也亦或通名之爲繩
水故晏謨伏琛爲齊記並云東陽城旣在繩水之
陽宜爲繩陽城非也世又謂陽水爲洋水余按羣

水經 卷之二十六
書盛言洋水出臨朐縣而陽水導源廣縣兩縣雖
隣川土不同於事疑焉濁水又北逕臧氏臺西又
北逕益城西又北流注巨淀地理志曰廣縣爲山
濁水所出東北至廣饒入巨淀巨淀之右又有女
水注之水出東安平縣之蛇頭山從征記曰水西
有栢公冢甚高大墓方七十餘丈高四丈員墳圍
二十餘丈高七丈餘一墓方七丈二墳晏謨曰依
陵記非葬禮如承世故與其母同墓而異墳伏琛
所不詳也冢東山下女水原有栢公祠侍其衡奏
魏武王所立曰近日路次齊郊瞻望栢公墳壟在

南山之阿請爲立祀爲塊然之主郭緣生述征記
曰齊栢公冢在齊城南二十里因山爲墳大冢東
有女水或云齊栢公女冢在其上故以名水也女
水導川東北流甚有神焉化隆則水生政薄則津
竭燕建平六年水忽暴竭玄明惡之寢病而亾燕
太上四年女水又竭慕容超惡之燕祚遂淪女水
東北流逕東平安縣故城南續述征記曰女水至
安平城南伏流一十五里然後更流注北楊水城
故鄒亭也春秋魯莊公三年紀季以鄒入齊公羊
傳曰季者何紀侯弟也賢其伏罪請鄒以奉五祀

田成子單之故邑也後以爲縣博陵有平故此加東也世祖建武七年封菑川王子劉茂爲侯國又逕安平城東東北逕壘丘東東北入淀地理志曰菑頭山女水所出東北至臨淄入巨淀又北爲馬車瀆北合淄水又北時繩之水注之時水出齊城西南北二十五里平地出泉卽如水也亦謂之源水因水色黑俗又目之爲黑水西北逕黃山東又北歷愚山山東有愚公冢時水又屈而逕杜山北有愚公谷齊桓公時公隱於谿隣有認其駒者公以與之山卽杜山之通阜以其人狀愚故謂之愚公故山水有石梁亦謂爲石梁水又有澧水注之水出時水東去臨淄城十八里所謂澧中也俗以澧水爲宿留水西北入于時水孟子去齊三宿而後出澧故世以此而變水名也水南山西有王歆墓昔樂毅伐齊賢而封之歆不受自縊而歆水側有田引水溉跡尚存時水又西北逕西安縣故城南本渠也齊大夫雒稟之邑矣王莽更之曰東寧時水又西至石洋堰分爲二水謂之石洋口枝津西北至梁鄒入沛時水又北逕西安城西又北京水系水注之水出齊城西南世謂寒泉也東北流

直申門西京相璠杜預並言申門卽齊城南面西
第一門矣爲申池昔齊懿公遊申池邴戎庸職二
人害公於竹中今池無復髣髴然水側尚有小小
木以時遺生也左思齊都賦注申池左海濱齊
藪也余按春秋襄公十八年晉伐齊戊戌伐讎門
之荻巳亥焚雍門壬寅焚東北二郭甲辰東侵及
沂而不言北掠于海且晉獻子尚不辭歿以逞志
何容對仇敵而不徵暴草木于海隅乎又炎夏火
流非遠遊之辰懿公見弑蓋曰白龍魚遯見困近
郊矣左氏捨近遺遠考古非議杜預泛言有推據

耳系水傍城北流逕陽門西水次有故封處所謂
齊之稷下也當戰國之時以齊宣王喜文學遊說
之士鄒衍淳于髡田駢接于慎到之徒七十六人
皆賜列第爲上大夫不治而論議是以齊稷下學
士復盛且數百十人劉向別錄以稷爲齊城門名
也談說之士期會於稷門下故曰稷下也鄭志曰
張逸問贊云我先師棘下生何時人鄭玄答云齊
田氏時善學者所會處也齊人號之棘下生無常
人也余按左傳昭公二十二年莒子如齊盟于稷
門之外漢以叔孫通爲博士號稷嗣君史記音義

水經 卷之三十六
曰欲以繼蹤齊稷下之風矣然棘下又是齊城內地名左傳定公八年陽虎劫公伐孟氏入自上東門戰于南門之內又戰于棘下者也蓋亦儒者之所萃焉故張逸疑而發問鄭玄釋而辯之雖異名于見大歸一也城內有故臺有營丘有故景王祠卽朱虛侯章廟矣晉起居注云齊有大蛇長三百步負小蛇長百餘步逕於市中市人悉觀自北門所入處也北門外東北二百步有齊相晏嬰冢宅左傳晏子之宅近市景公欲易之而嬰弗更爲誠曰吾生則近市死豈易志乃葬故宅後人名之曰清節里系水又北逕臨淄城西門北而西流逕梧宮南昔楚使躬齊齊王饗之梧宮卽是宮矣其地猶梧臺里臺甚層秀東西一百餘步南北如減卽古梧宮之臺臺東卽關子所謂宋愚人得燕石處臺西有石柱碑碑猶存漢靈帝熹平五年立其題云梧臺里系水又西逕葵丘北春秋莊公八年襄公使連稱管至父戍葵丘京相璠曰齊西五十里有葵丘地若是無戍之僖公九年齊相會諸侯于葵丘宰孔曰齊侯不務修德而勤遠畧葵丘不在齊也引胡廣汾陰葵丘山陽西北葵城宜在此非

也余原左傳連稱管至父之戍葵丘以瓜時而往
還之期請代弗許將爲齊亂故令無寵之姝候公
於宮因無知之絀遂害襄公若出遠無代寧得謀
及婦人而爲公室之亂乎是以杜預稽春秋之旨
卽傳安之注于臨淄西不得捨近託遠苟成已異
於異可姝卽義爲負然則葵丘之戍卽此地也時
水西左迤爲潭又西逕高陽僑郡南魏所立也又
西北流注于時時水又東北流繩水注之水出營
城東世謂之漢溱水也西北流逕營城北漢景帝
四年封齊悼惠王子劉信都爲侯國繩水又西逕

樂安南博昌縣故城南應劭曰昌水出東萊昌陽
縣道遠不至取其嘉名闕駟曰縣處勢平故曰博
昌繩水西歷貝丘京相璠曰博昌縣南近繩水有
地名貝丘在齊西北四十里春秋莊公八年齊侯
田于貝丘見公子彭生豕立而泣齊侯墜車傷足
於是處也繩水又西北入時水從征記又曰水出
臨淄縣北逕樂安博昌南界西入時水者也自下
通謂之爲繩也昔晉侯與齊侯宴齊侯曰有酒如
繩指喻此水也時水又屈而東北逕博昌城北時
水又東北逕齊利縣故城北又東北逕巨淀縣故

水經 卷之三十六
城北又東北逕廣饒縣故城北東北入淄水地理
風俗志曰淄入濡淮南子曰白公問微言曰若以
水投水如何孔子曰淄繩之水合易牙嘗而知之
謂斯水矣

又東北入于海

淄水入馬車瀆亂流東北逕琅槐故城南又東北
逕馬井城北與時繩之水互受通稱故邑流其號
又東北至皮丘沈入于海故晏謨伏琛並言淄繩
之水合於皮丘沈西地理志曰馬車瀆至琅槐入
于海也蓋舉縣言也

汶水出朱虛縣泰山

山上有長城西接岱山東連琅邪巨海千有餘里
蓋田氏之所造也竹書紀年梁惠成王二十年齊
築防以爲長城竹書又云晉列公十二年文王命
韓景子趙列侯翟員伐齊人長城史記所謂齊威
王越趙侵伐我長城者也伏琛晏謨並言水出縣
東南崑山山在小泰山東者也

北過其縣東

汶水自縣東北逕崑城北地理風俗記曰朱虛縣
東四十里有崑城亭故縣也又東北逕管寧冢東

水經 卷之二十六 十三
故晏謨言柴阜西南有魏獨行君子管寧墓墓前有碑又東北逕柴阜山北山之東有徵士邴原冢碑誌存焉汶水又東北逕漢青州刺史孫嵩墓西有碑碣汶水又東逕安丘縣故城北漢高帝八年封將軍張說爲侯國地理志曰王莽之誅邳也孟康曰今渠丘亭莒渠丘城是也伏琛晏謨齊記並言亭在丘城東北十里非城也城對牟山山之西南有孫賓碩兄弟墓碑志並在也

又北過淳于縣西又東北入于縣故夏后氏之斟灌國也周武王以封淳于公號曰淳于國春秋桓公六年冬周公如曹傳曰淳于公如曹度其國危遂不復也其城東北則兩川交會也

濰水出琅邪箕縣

琅邪山名也越王勾踐之故國也勾踐并吳欲霸中國徙都琅邪秦始皇二十六年滅齊以爲郡城卽秦王之所築也遂登琅邪大樂之山作層臺於其上謂琅邪臺臺在城東南十里孤立特顯出于衆山上下周二十里餘傍濱巨海秦王樂之因留三月乃徙黔首二萬戶於琅邪山下復十二年所

作臺基三層層高三丈上級平敞方二百餘步高五里刊石立碑紀秦功德臺上有神淵淵主靈焉人汗之則竭齊潔則通神廟在齊八祠中漢武帝亦嘗登之漢高帝呂后七年以為王國文帝三年更名為郡王莽改曰填夷矣濰水導源濰山許慎呂忱云濰水出箕屋山淮南子曰濰水出覆舟山蓋廣異名也東北逕箕縣故城西又西析泉水注之水出析泉縣北松山東南流析泉縣東又東南逕仲固山東北流入于濰地理志曰至箕縣北入濰者也濰水又東北逕諸縣故城西春秋文公十

二年季孫行父城諸及鄆傳曰城其下邑也王莽更名諸并矣濰水又東北涓水注之出馬耳山山高百丈上有二石並舉望齊馬耳故世取名焉東去常山三十里涓水發于其陰北逕婁鄉城東春秋昭公五年經書夏莒牟夷以牟婁防茲來奔者也又分諸縣之東為海曲縣故俗人謂此城為東諸城涓水又北注于濰水

東北過東武城縣西

縣因岡為城城周三十里漢高帝六年封郭蒙為侯國王莽更名之曰祥善矣又北左合扶淇之水

水出西南常山東北流注濰晏謨並以濰水爲扶
淇之水以扶淇之水爲濰水非也按經脉誌濰自
箕縣北逕東武縣西北流合扶淇之水晏謨伏琛
云東武城西北二里濰水者卽扶淇之水也濰水
又北右合盧水卽久台水也地理志曰水出琅邪
橫縣故山王莽之合丘也山在東武縣故城東南
世謂之盧山也西北流逕昌縣故城西東北流齊
地記曰東武城東南有盧水水側有勝火木方俗
音曰櫪子其木經野火燒灰不滅故東方朔不
灰之木者也其水又東北流逕甫縣故城東而

西北入濰地理志曰久台水出東南逕東武入濰
者也尚書所謂濰淄其道矣

又北過平昌縣東

濰水又北逕石泉縣故城西王莽之養信也地理
風俗記曰平昌縣東南四十里有石泉亭故縣也
濰水又北逕平昌縣故城東荆水注之水出縣南
荆山阜東北流逕平昌縣故城東漢文帝封齊悼
惠王肥子永爲侯國城之東南角有臺臺下有井
與荆水通物墜於井則取之荆水昔常有龍出入
于其中故世亦謂之龍臺城也荆水又東北流注

于濰水又北浯水注之水出浯山世謂之巨平山也地理志曰靈門縣有高原山與浯一山浯水所出東北入濰今是山西接浯山許慎說文言水出靈門山世謂之浯汶矣其水東北逕姑幕縣故城東縣有五色土王者封建諸侯隨方受之故薄姑氏之國也闕駟曰周成王時薄姑與四國作亂周公滅之以封太公是以地理志曰或言薄姑也王莽曰季睦矣應劭曰左傳曰薄姑氏國太公封焉薛瓚漢書注云博昌有薄姑城未知孰是浯水又東北逕平昌縣故城北古竭此水以溢溉田南注荆水浯水又東北流而注于濰水也

又北過高密縣西

應劭曰縣有密水故有高密之名也然今世所謂百尺水者蓋密水也水有二源西源出奕山亦曰鄆日山晏謨曰山狀鄆日是有此名伏琛曰山上鄆日故名鄆日山也其水東北流東源出五弩山西北流同瀉一壑俗謂之百尺水古人竭以溉田數十頃北流逕高密縣西下注濰水自下亦兼通稱焉亂流歷縣西碑產山西又東北水有故堰舊鑿石豎柱斷濰水廣六十許步掘東岸激通長渠

東北逕高密故城南明帝中元中封鄧震爲侯國
縣南十里蓄以爲塘方二十餘里古所謂高密之
南都也溉田一頃許陂水散流下注矣安澤澠水
自堰北逕高密縣故城西漢文帝十六年別爲膠
西國宣帝平始元年更爲高密國王莽之章牟也
澠水又北昔韓信與楚將龍且夾澠水而陣於此
信夜令爲萬餘囊盛沙以遏澠水引軍擊且僞退
且追北信決水水大至且軍半不得渡遂斬龍且
於是水水西有鴈阜阜上有漢司農卿鄭康成冢
石碑猶存又北逕昌安縣故城東漢明帝中元中
封鄧襲爲侯國也郡國志曰漢安帝延光元年復
也

又北過淳于縣東

澠水又北左會汶水北逕平城亭西又東北逕密
鄉亭西郡國志淳于縣有密鄉地理志皆北海之
屬縣也應劭曰淳于縣東北六十里有平城亭又
四十里有密鄉亭故縣也澠水又東北逕下密縣
故城西城東有密阜地理志曰有三石山祠余按
應劭密者水名是有下密之稱俗以名阜非也

又東北逕都昌縣東

水經 卷之三十六
十一
濰水東北逕逢萌縣人也少有大節耻給事縣亭
遂浮海至遼東復還在不其山隱學明帝安車徵
萌以佯狂免又北逕都昌縣故城東漢高祖六年
封朱軫爲侯國北海相孔融爲黃巾賊管玄所圍
於都昌也太史慈爲融求救劉備持的突圍其處
也

又東北入于海

膠水出黔陬縣膠山北過其縣西

齊記曰膠水出五弩山蓋膠山之殊名也北逕祝
茲縣故城東漢武帝元鼎中封膠東康王子延爲
侯國又逕扶縣故城西地理志琅邪之屬縣也漢
文帝元年封呂平爲侯國膠水又北逕黔陬故城
西袁崧郡國志曰縣有介亭地理志曰故介國也
春秋僖公九年介葛盧來朝聞牛鳴曰是生二犧
皆用之問之果然晏謨伏琛並去縣有東西二城
相去四十里有膠水非也斯乃拒艾水也水出縣
西南拒艾山卽齊記所謂黔艾山也東北流逕拒
縣故城西王莽之秩國也世謂之王城又謂是水
爲洋洋水矣又東北逕晏伏所謂黔陬城西四十
里有膠水者也又東入海地理志曰琅邪有推縣

水經 卷之三十六
拒艾水出焉東入海卽斯水也今膠水北逕晏伏
所謂西黔陬城東高密郡側有黔陬縣地理志曰
膠水出郯縣王莽更之純德矣疑卽是縣所未詳
又北過夷安縣東

縣王莽更名之曰原亭也應劭曰故萊夷邑也太
史公曰晏平仲萊之夷維之人也漢明帝中元中
封鄧珍爲侯國西去濰水四十里膠水又北逕膠
陽東晏伏並謂之東亭自亭結路南通夷安地理
風俗記曰濇于縣東南五十里有膠陽亭故縣也
又東北逕左會一水世謂之張奴水水發夷安縣

東南阜下西北流歷膠陽縣注于膠水之左東北
爲濇水渚百許里謂之夷安潭潭之濇周四十里
亦濇水枝津之所注也膠水又東北逕下密縣故
城東又東北逕膠東縣故城西漢高帝元年別爲
國景帝封子寄爲王國王莽更之郁秩也今長廣
郡治伏琛晏謨言膠水東北廻達于膠東城北百
里流注于海

又北過當利縣西北入于海

縣故王莽更之東萊亭也又北逕平度縣漢武帝
元朔二年封菑川懿王子劉衍爲侯國王莽更名

之曰利盧也縣有土山膠水北歷土山注于海海
 南土山以北悉鹽坑相承修煮不輟北眺巨海杳
 冥無極天際兩分白黑方別所謂之溟海者也故
 地理志曰膠水北至平度入海者也

水經第二十六



